

## Historia di Bushiribana


### Un tiki di historia di oro:



Na aña 1824, un mucha homber Arubiano, Willem Rasmeyn di 12 aña, yiu di Jacobo Rasmeyn, a haya un pida oro banda di Rooi Fluit. Esey tabata e prome oro di Aruba, cu a lanta un movencion grandi na Aruba pa busca oro. Pero gobierno mes a tuma e cuenta di buscamiento di oro. Pesey hende a bin papia riba "Compania di Rey"; gobierno a traha na nomber di Rey di Hulanda, mescos manera nan tabata papia na nomber di Rey di Hulanda y tambe riba Magashina di Rey, Montagne di Rey, Catibo di Rey.

Nan tabata busca oro principalmente na Rooi Fluit, Arikok, Daimari y tambe na Casibari, Weburi (Piedra Plat) y otro luga. Durante seis luna di aña 1826, nan a haya 2239 gram di oro, esta cuatro liber y mei. Balor di oro tabata mas of menos 150 florin pa un gram. Compania di Rey tabatin varios Aleman den sirbishi. Dos ingeniero, p.e. Stiffy y Wirz y dos minero Pfeiffer y Schumacher. E ultimo aki a muri na hospital di Aruba dia cu gobierno a stop e trabou den oro, esta na januari 1829. Mientras tanto nan a cuminsa busca tambe na Westpunt cu yama Hadicuri (Hadicurari). E minanan di oro na Westpunt yama: Tibushi, Bena Sigur, Bentura y Cubeo. E oro di Tibushi tabata oro rico, esta "oro cu piedra aden", mientras otro luga nan tabata haya "piedra cu oro aden". Hopi hende tabata busca oro pa nan cuenta y bende cu hendenan na Playa. Sr. Adriaan Lacle tabata un comprador di oro.

Oro a trece tambe pobresa na Aruba, specialmente pa e cunukeronan, cu pa motibo di oro a lubida nan trabou den cunucu y asina descustumbra di e plantamento. Tabatin un Frances, Luis Bazin, naci na Landenau di Bretagne, na aña 1793 cu a bini Aruba y a traha den mina di oro na Cristal, Marawiel, Matividiri, etc. E tabatin mas o menos cuarenta



*Mina di Oro na Mira Lamar*

catibo. Luis Bazin a casa cu Regina Jacomina Croes kendenan tabata comprador di oro. Na aña 1853 ora Luis a muri, su esposa ta bolbe casa cu un Italiano cu a yega e mesun aña. Esey tabata Pedro Joseph (Pep) Frigerio cu a bin Aruba como agente biahero y tambe a bay den negoshi di oro. Tur e

catibonan di Luis Bazin a wordo pasa pa Sr. Frigerio. Su yiu homber tambe a traha na Westpunt. Plino tabata esun cu tabata conseha e compania pa busca minero Italiano pa Bushiribana.



*Fabrica di Oro na Bushiribana*



*Fabrica di Oro na Balashi*

#### Bushiribana:

Na aña 1870, un compania Mericano tabata traha na Aruba cu tabata busca oro na Sero Moskita y Tres Cabes, parti nort di Aruba. Un compania Ingles "Aruba Island Goldmining Company, London" a sigui e compania Mericano aki for di aña 1872 te cu 1881. Na 1874 nan a traha e fabrica na Boca Mahos, esta Bushiribana pa mula piedra di oro y laba oro. Algun metsla di Corsou hunto cu metsla mas conoci na Aruba, Alexander Donati, a construi e fabrica. Pa hisa e piedranan grandi, cu ainda nos por weita den e ruina, nan a traha un grua di palo.

Aya tabata mas cerca di e minanan di Cristal, Matavidiri, Gerard, Kadushi, Bazijn, Wariruri. Pero nan tabata traha tambe na Rooi Fluit, Sabanilla, Piedra Cacho, Daimari, Baas Dirk, Hala Pipa, Rooi Burico, Golf, Lorant, Boca Rico, Kudiwari, Tamarijn, Parca, Shita y Angochi.

Sistema di trabou tabata basta primitivo ainda. Nan tabata bora den piedra di tunnel cu penchi di hero y martiu grandi. Nan tabata hisa e piedra den un caha di tabla cu un fila di trahado mester a pasa un pa otro. Mas o menos 200 te 300 hende tabata traha na Bushiribana. Inglesnan cu mas tanto tabata dirigi e trabou di mina tabata p.e. Mr. Long, Tilly, Tepson, Williams, Rendervries, Thomas, Richardson, Hong, June, Newton, Rool, Ibottson. Asina por lo menos hende ta corda nan number. Mayoria di nan tabata biba na Bushiribana mes, caminda nan a traha varios cas. Dos Ingles tabata biba den un cas di lodo na pia di Sero Gerard banda di Wariruri. Pida pipa di tera cora, cu ta haya aya, ta muestra cu nan tambe tabata gusta huma pipa. Dos Ingles ruman a muri eynan di keintura geel y a keda derá banda di Bena Hill na Wariruri.

Jan van der Biest tabata cahero pa e compania di Bushiribana. Arubiano cu tabata cabesante di un ploeg, hefe tabata p.e.: Antoin Erasmus, Camillo Erasmus, Bito Geerman, Koochi (Jacinto) Croes, Martijn Bremen, Elias Angela, Jan Hendrik Almari, Jan Hendrik de Mey, Bartolomeo Dania, Sjaki Wernet, Jan Boekhouder, Antonio Britten y Johannes Paskel.

Famia Rozenburg di Nuñe, Oscar, Otilio, Romualdo Chemmie, tambe tabata traha na Bushiribana. Chemmie Rozenburg tabata traha den laboratorio di Bushiribana.

Jan Hendrik Almari, hefe cerca Mr. Rool, tabata gusta haci pret. Ora cu Mr. Rool a yega di bisa: "Tur hende na tera", kier meen, tur hende na fila pa hisa tera for di mina. Jan Hendrik a pasa e encargo "Bai drumi", manera si el a compronde robes. Tur e trahadonan a cay drumi.

Compania Ingles a coba hopi tunnel largo na Cristal, Gerard y Kadushi. Tabatin un tunnel cu a bay for di Cristal te den Gerard.

#### Minero Italiano:

Na 1880 compania Ingles a rondea poco Italiano pa traha den mina di oro. E idea pa bay busca nan te na Italia a bay probablemente di famia Frigerio. Nan a haya 27 Italiano di Villa Maritima, un pueblo cerca di Livorno na Toscano. Un bapor a trece nan Aruba riba un contract di un año. Nan trabou tabata principalmente na Bushirbana.

Despues di un año nan a bolbe Italia. Pero un grupo di mucha homber Italiano no kier a bay, nan tabata gusta Aruba masha hopi. Joseph Petrocchi, cu tabata aki cu dos yiu homber, Victorio y Antonio, a bay abordo di un bapor pa Corsou pa bolbe Italia, caminda su señora cu seis yiu homber mas a keda. Na Corsou Victorio y Antonio Petrocchi a hui bay for di nan tata, a sconde y warda riba un barco cu por hiba nan Aruba atrobe.

E Italianonan na Bushiribana a haya nan amigo di trabou, manera Pascual Kelly y Sintjago Kelly di Tanki Leendert. Pascual Kelly casá cu Johanna Maria Dijkhoff, ruman di Johanna Maria, tabatin algun yiu muhe di edad, bunita, amabel y teenager. E muchanan homber Italiano a bira tambe amigo di nan. Diasabra y Diadomingo nan tabata gusta keiro den Tanki Leendert, canta nan cancionnan bunita cu e muchanan muhe di e bario ey tabata gusta hopi.

E resultado di e amistad aki a resulta den e siguiente matrimonionan:

1884 – Cajetano Jacopucci cu Cypriano Kelly

1884 – Eugenio Falconi cu Susanna Gregoria Dijkhoff

1885 – Cajetano Jacopucci cu Adeleida Naba (Cypriana, prome casá a muri)

1885 – Victorio Petrocchi cu Faustina Kelly (ruman di Cypriana)

1895 - Victorio Petrocchi cu Federica Kelly (ruman di Cypriana)

1895 - Antonio Petrocchi cu Josefita Kelly (prima ruman di Cypriana)

E Italianonan tabata bon minero. Casi tur di nan tabata hefe. Eugenio Falconi tabata hefe na Kadushi cerca di Matavidiri, despues el a bay traha na Seroe Colorado caminda el a biba pa seis aña . Su yiu, Hiacintho Falconi, tabata hefe na Miralamar. Cajetano Jacupucci tabata hefe na Calabas. Antonio y Victorio Petrocchi tambe tabata hefe na Balashi.

Jacobo Rasmeyn na aña 1820 tabata tambe Erasmus, esey kier meen cu famia Rasmeyn y Erasmus tabata di un mesun famia original. (Nos por nota tambe cu e tempo ey e famnan tabata scirbi contrario cu awendia.)

***Dufi Kock***

***Escritor y Historiado***

***Savaneta 125-F***

***Tel: 548-1201***

***Cel: 592-9417***

***[dufikock@gmail.com](mailto:dufikock@gmail.com)***

***Lid in de Orde van Oranje Nassau 2006***